

DOMINGU III TEMPU PÁSKUA NIAN – TINAN C

Tema

Liturjia domingu ne'e nian hatudu papél komunidadade sarani nian nu'udar espasu privilejiadu ba enkontru ho Jezús moris-hi'as.

Evanjellu subliña ideia katak Jezús ne'ebé moris-hi'as mak sentru komunidadade sarani nian; hale'u Nia mak komunidadade ida estruturada no simu husi Nia kbiit atu enfrenta difikuldade no persegisaun sira. Husi sorin seluk, iha moris komunidadade nian (liturjia, domin, sasin) mak ema sira hetan prova katak Jezús moris hela.

Leitura daruak insiste kona-ba motivu sentralidade Jezús nian nu'udar referénsia fundamentál komunidadade sarani nian. *Leitura* apresenta Nia la'o hamutuk ho nia Keda iha lurón sira istória nian no sujere katak iha Nia mak komunidadade hetan forsa atu la'o no manán kbiit sira ne'ebé kontra moris foun Maromak nian.

Leitura dahuluk sujere katak komunidadade sarani kontinua iha mundu misaun salvasaun Jezús nian; no hodi halo nune'e, nia fó sasin kona-ba Jezús moris-hi'as ne'ebé kontinua apresenta ninia proposta salvasaun ba ema hotu.

LEITURA I – Apost. 5,12-16

Livru Apóstolu sira nia hahalok apresenta “dalan” ne'ebé Jezús nia Kreda halo, husi Jerusalém to'o Roma, sentru impériu nian. Iha Jerusalém, mak salvasaun mosu – katak fatin iha-ne'ebé Kristu terus mate, moris-hi'as no sae ba lalehan – husi ne'e mak hahú buat hotu. Iha fatin ne'e moris komunidadade sarani dahuluk, no sai sasin Jezús nian iha mundu nia oin. Testu ne'ebé propoin mai ita mak sumáriu ida entre sumáriu tolu ne'ebé ita hetan iha parte dahuluk “Apóstolu sira-nia hahalok”; sumáriu sira-ne'e apresenta tema komún iha estrutura no afinidade. Sira hatudu aspetu oioin Kreda Jerusalém nia sasin. Sumáriu dahuluk iha 2,42-47 dedika ba tema unidade no impaktu ne'ebé estilu sarani provoka iha povu sidade nian; sumáriu daruak iha 4,32-37 no dedika ba tema partilla soin nian; datoluk (leitura ohin nian) apresenta Kreda nia sasin liuhusi atividade milagre apóstolu sira-nian.

MENSAJEN

Leitura ne'e nia fraze uluk liu apresenta tema: “liuhusi apóstolu sira liman realiza milagre barak no hahalok kmanek oioin iha povu nia leet”.

Hanesan iha atitvidade halo milagre Jezús nian ne'ebé ita haree iha evanjellu sinóptiku sira, iha ne'e mós ita bele dehan katak narraisaun sira-ne'e la'ós reportajen fotografika akontesimentu sira-nian, maibé rezumu teolójiku ida; Lucas haree katak iha kontinuidade entre Jezús nia misaun no komunidadade sarani nia misaun (Jezús nia atividade maksoi'k no libertadora ba ema kiak sira no sira ne'ebé ema hanehan kontinua agora iha mundu liu husi nia Kreda).

Apóstolu sira bele buat hotu la'ós tanba sira nia kbiit rasik maibé tanba sira simu kbiit ne'e husi Kristu atu bele fó sasin kona-ba Nia (kf. Act 5,15b kona-ba Pedro nia lalatak atu kura). Nune'e sira-nia jestu hotu serve atu fó sasin kona-ba resureisaun, katak moris foun ne'ebé Kristu hahú ona no liuhusi eskolante sira tenke to'o ba ema hotu.

LEITURA II – Ap 1,9-11a.12-13.17-19

Ita iha tempu ikus Domiciano nia ukun nian (tinan 95 nune'e); iha persegisaun maka'as hasoru sarani sira. Sarani barak tanba ta'uk husik tiha Evanjellu hodi adere fali ba imperadór. Iha comunidade laran sira hateten: “Jezús mak Na'i”; iha li'ur sé mak manda nu'udar na'i bele buat hotu mak Imperadór Roma nian.

Iha kontestu persegisaun nian ida-ne'e, ta'uk nian, martíriu nian mak ema hakerek Apokalipse. Autor nia objetivu mak apresenta ba sarani sira konvite ida ba konversaun (primeira parte – Ap 1-3) no leitura profética ida kona-ba istória ne'ebé tulun sira atu enfrenta tempestade ho esperansa no fiar iha vitória final Maromak nian no sarani sira nian (segunda parte – Ap 4-22).

Testu primeira leitura nian pertense ba primeira parte livru nian. Ho linguajen simbólica, testu apresenta realidade mistériu “Mane Maksoin nian”: Nia mak Na'i istória nian no liuhusi Nia mak Maromak revela ninia projetu ba ema sira.

MENSAJEN

“Mane Maksoin ne'e” (Mane nia Oan) mak Kristu moris hi'as. Atu bele hatudu nia didi'ak, autor (João, ne'ebé desterradu iha illa Patmos nian tanba Evanjellu) uza símbolu sira Testamentu Tuan nian ne'ebé subliña Jezús nia divindade.

Testu apresenta katak “Mane Maksoin” mak Na'i ne'ebé prezide ninia Kreda no la'o iha nia leet no ho nia (vers. 13a); Nia hatais dignidade saserdotál (vers. 13b) no soi dignidade liurai nian (vers. 13c). Liuliu nia mak Kristu mistériu paskál nian: nia mate. Fila fali ba vida no agora nia mak Na'i moris nian ne'ebé manán tiha mate (vers. 18). Istória hahú no hotu iha Nia (vers. 17b). Tanba ne'e, sarani sira la bele ta'uk.

Kristu moris hi'as entrega misaun profética ida ba João atu fó sasin bá. Haree ba João ne'ebé monu ba rai hanesan mate no Na'i ne'ebé reanima nia ho jestu ida (vers. 17) halo ita hanoin kona-ba relatu oioin vokasaun profética iha Testamentu Tuan. “Profeta” João simu misaun, Na'i haruka nia ba kreda sira; nia misaun mak haklaken mensajen ida esperansa nian ne'ebé bele fó forsa atu enfrenta laran-ta'uk no persegisaun. Liuliu, simu bolun atu haklaken katak Jezús moris hela, la'o hela ho nia Kreda no ho Nia, la iha buat aat ida bele akontese tanba nia mak ukun istória.

EVANJELLU – Jo 20,19-31

Ita kontinua segunda parte Evanjellu Dahaat nian, iha nia ita haree comunidade Aliansa Foun nian. Indikasaun katak ita iha “loron uluk semana nian” halo referénsia kona-ba tempu foun, tempu ne'ebé mai tuir ba Jezús nia mate no moris-hi'as, tempu kriaun foun nian.

Komunidade nu'udar Jezús nia liman-fatin halibur malu iha senákulu, iha Jerusalém. Komunidade ne'e sente insegura, mesak, ho ambiente ida ne'ebé la simu sira, Sira sente ta'uk tanba sira seidauk halo esperiénsia Kristu moris hi'as nian.

MENSAJEN

Testu ne'ebé propoin mai ita fahe ba parte rua la hanesan.

Iha primeira parte (kf. Jo 20,19-23), haktuir Jezús nia “aparisaun” ida ba eskolante sira. Hatudu tiha katak sira moris iha situasaun inseguransa no fragilidade nian (“kalan”, “odamatan taka metin”, ta'uk”), autor apresenta Jezús iha “sentru” comunidade (vers. 19b). Hodi mosu iha “sira-nia leet”, Jezús asume an nu'udar pontu referénsia nian, fatór unidade

nian, uvas-hun iha-ne'ebé sira seluk mak sanak. Komunitade hale'u Nia, tanba Nia mak sentru no hotu-hotu hetan moris husi Nia.

Ba komunitade taka an, ho ta'uk, moris iha nakukun ho mundu ida ne'ebé sai inimgu ba nia, mak Jezús fó dame ba dala rua (vers. 19 no 21: ne'e mak "shalom" ebraiku, ho signifikadu armonia, serenidade, hakmatek, konfiansa). Eskolante sira hetan serteza katak Jezús manán buat hotu ne'ebé hamta'uk sira: mate, opresaun, ostilidade "mundu" nian.

Hafoin (vers. 20a), Jezús hatudu ninia "identidade": iha liman sira no nia sorin sona borus, bele haree sinál sira ninia domin no saran an nian. Iha sinál sira domin no doasaun nian mak komunitade rekoñese Jezús moris no horik iha sira leet. Sinál ne'ebé hela nafatin hatudu Jezús nia domin ne'ebé hela ba nafatin: Nia mak Mesias ne'ebé hadomi, no husi nia suli bee no raan ne'ebé harii no habiit komunitade.

Tuir mai (vers. 22), Jezús "huu iis ba sira". Verbu uza iha-ne'e mak ida hanesan ho testu gregu iha Gn 2,7 (bainhira dehan Maromak huu ba ema husi rai, hodi haraik moris). Ho "iis" Gn 2,7 nian, ema sai moris, ho "iis" ne'e, Jezús haraik moris foun ba ema. Oras-ne'e ema sira soi Espíritu, Maromak nia moris, atu bele – hanesan Jezús – fó ho laran luak ba ema seluk. Espíritu ida-ne'e mak harii no anima komunitade.

Jezús nia liafuan ba komunitade soi mós referénsia ba misaun (vers. 23). Eskolante sira simu misaun atu kontinua lori ba umanidade Jezús nia saran an ne'ebé lori vida foun. Sé mak aseita proposta ida-ne'e integra an iha komunitade; sé mak rejeita la tama iha komunitade Jezús nian.

Iha segunda parte (kf. Jo 20,24-29), iha katekeze ida kona-ba fiar. Oinsá to'o ba fiar iha Kristu moris hi'as? João hatán: ita bele halo esperiénsia fiar iha Jezús moris hi'as iha komunitade sarani nia laran, fatin naturál iha-ne'ebé hatudu no naksira Jezús nia domin. Tomé reprezenta sira ne'ebé taka an rasik (iha li'ur) no la halo kazu ba sasin komunitade nian no la haree sinál sira vida foun nian ne'ebé komunitade hatudu sai. Envezde integra an no partisipa iha esperiénsia hanesan, nia hakarak hetan demonstrasaun partikulár husi Maromak.

Ikusmai, Tomé halo esperiénsia Kristu moris hi'as iha komunitade nia laran. Tanba sá? Tanba, iha "Na'i nia laron", nia fia fali ba ninia komunitade. Ne'e mak aluzaun ida ba laron domingu, laron iha ne'ebé komunitade halibur hamutuk atu selebra Eukaristia: iha enkontru ho domin fraternu, ho maun-alinsira nia perdaun, ho Liafuan ne'ebé haklaken, ho paun Jezús nian mak bele deskobre Jezús moris hi'as.

Hanesan Tomé nia esperiénsia sarani tempu hotu nian bele halo mós esperiénsia ida-ne'e.